

ՎԵՐՋԻՆ ՕՐԸ

- Եփրատի ափին դեմուդեմ եկած՝
Զարկվում էին խիստ, զարկվում ու զարկում
Աննահանջ ու քաջ խըմբերը հայի
Եվ քուրդն ու թուրքը կիտված արենխում:
- 5 Երբ որ հոգնեցին երկար զարկվելուց,
Երբ որ հոգնեցին բազուկները կուռ,
– «Հէյ, ընկեր, ասավ խըմբապետն արի,
Հէյ, ընկեր, ասավ, բարձրացիր շուտով,
Բարձրացիր Հայոց բարձրը լեռների
- 10 Ամենից բարձրը գագաթն ու նայիր,
Որտե՞ղ է, մի տէս, վերջը թըշնամու...»
Բարձրացավ ջըլուտ հայդուկը հայի,
Բարձրացավ բարձրը գագաթը լեռան
Ու հոգնած ձեռքը դըրեց ճակատին.
- 15 – «Խըմբապետ, ասավ, ընկեր խըմբապետ,
Տեսնում եմ հեռու հորիզոնները մութ
Եփրատի դալար հովիտներն ի վար՝
Մինչև Տավրոսի լեռները կապուտ,
Մինչև մըշուշոտ պարը Պոնտոսի,
- 20 Մինչև բարձրաբերձ ժայռերը Մոկաց...
Ծուխ է բարձրանում Մուշի հովիտից,
Ծուխ է բարձրանում Սասմա սարերից,
Ծուխ է բարձրանում Վանա կողմերից,
Ծուխ է բարձրանում Աբաղա դաշտից,
- 25 Կըրակ է կանգնած Զեյթունի վըրա...
Ամեն կողմերից թըշնամին գունդ-գունդ
Շարժվում է մեր դեմ, ու չի երևում,
Զեմ տեսնում վերջը նըրա շարքերի...»
– «Հէյ, ընկեր, ասավ խըմբապետն այնժամ,
- 30 Հէյ, ընկեր, ասավ, ետ նայիր հապա,

- Ետ նայիր, մի տես, հայերը հեռվից
 Ձե՛ն գալիս արդյոք մեզի օգնության...»
 Ու հոգնած ձեռքը դրեց ճակատին,
 Կըտրիճ հայդուկը նայեց դեպի ետ.
- 35 – «Խըմբապե՛տ, ասավ, ընկեր խըմբապետ,
 Տեսնում եմ ահա, ինչպես ափիս մեջ,
 Սև ծովից մինչև ծովը Վըրկանա,
 Մինչև Կովկասի պատնեշը ձյունոտ.
 Գալիս են խումբ-խումբ հայերը ճեպով,
- 40 Գալիս են ճեպով մեզի օգնության:
 Իշնում են Այունյաց մութ-մութ սարերից,
 Ելնում Գուգարքի խոր-խոր ձորերից,
 Շիրակի դաշտից մինչև Այրարատ,
 Ու ողջ ափերը Անուշ Արաքսի
- 45 Անվերջ տագնապով իրար են անցնում...
 Գալիս են ամեն կողմից Կովկասի,
 Գալիս են հեռո՛ւ, հեռու կողմերից,
 Գալիս են կարոտ պանդուխտներն ամեն,
 Գալիս են ցըրված տըղերքը նորից,
- 50 Գալիս են՝ պարզած դըրոշն հայրենի...»
 – «Հե՛յ, ընկեր, ասավ խըմբապետը փորձ,
 Հե՛յ, ընկեր, ասավ, սուր աչք ունիս դու,
 Նայիր դեպ հյուսիս, ավելի հեռու,
 Ձի՛ շարժվում արդյոք հյուսիսը հըզոր...»
- 55 Ու նայեց հայդուկն ավելի հեռու,
 Նայեց սըրատես աչքով արծվենի:
 – «Խըմբապե՛տ, ասավ, ընկեր խըմբապետ,
 Աչքըս չի կըտրում՝ որտեղից մինչ ուր՝
 Շարժվում է, ահա, հյուսիսն ընդհանուր.
- 60 Հորձանք է տալիս ծովն ըռուսական,
 Հորձանք է տալիս ծանր ու ահավոր,
 Դեպի ամեն կողմ՝ ափերն հեռավոր.

- Եվ, հուր ու շոգի շրնչելով ուժգին,
 Գընացքը կըտրած գընացքի ետև,
 65 Ու, գալարվելով հովիտից հովիտ,
 Գալիս են, ինչպես վիշապներ սև-սև...»
 – «Հէյ, ընկեր, կանչեց խըմբապետն արի,
 Հէյ, ընկեր, կանչեց, դէ ցած եկ արագ,
 Առ հըրացանըդ, դաշտն իջիր շուտով,
 70 Իջիր Սըրբազան ափը Եփրատի.
 Հին պատերազմի վերջին զարկն է սա,
 Հին ոճրագործի հոգեվարքն է սա...»
 – «Խըմբապետ, կանչեց, ընկեր խըմբապետ,
 Խըմբապետ, կանչեց հայդուկը ջահել,
 75 Հայոց երկնահաս լեռների վըրա
 Խոր, խորհրդավոր ձայներ են լսվում.
 Դրզըրդում է խուլ երկինքը վերից
 Էն անհուն, անքուն, անթիվ ձայներից...»
 – «Հէյ, ընկեր, կանչեց խըմբապետը հին,
 80 Հէյ, ընկեր, կանչեց, խաչ հան երեսիդ.
 Էդ կյանքում տանջված, տանջանքով մեռած
 Անթիվ, անհամար, անբախտ հայերի
 Հոգիներն են հեգ, որ լաց ու կոծով,
 Արյան մըրրիկով երկինք վերացան:
 85 Փոթորկում են դեռ Աստծու առաջին,
 Բողոքում անհուն երկրնքովը մին.
 Նըրանց բողոքի աղմուկն է անլուռ,
 Հասնում է ներքև՝ հայի ականջին...
 Հէյ, ընկեր, ասավ, խաչ հան երեսիդ,
 90 Առ հըրացանըդ, դաշտն իջիր շուտով,
 Իջիր Սըրբազան ափը Եփրատի,–
 Մեծ տառապանքի վերջին օրն է սա...»